



Pou Piblikasyon Imedya: 22/11/2022

GOUVÈNÈ KATHY HOCHUL

## GOUVÈNÈ HOCHUL ANONSE MEZI POU ANPECHE KRIM RAYISANS AK PWOTEJE NOUYÒKÈ YO

*Siyen Lejislasyon (S.6570/A.1202) pou egzije moun ki kondane pou krim rayisans yo swiv yon fòmasyon obligatwa nan prevansyon ak edikasyon kont krim rayisans ak Lejislasyon (S.123A/A.5913A) pou etabli yon kanpay nan tout Eta a ke Divizyon Dwa Moun te devlope epi dirije pou pwomouvwa akseptasyon, enklizyon, tolerans, ak konpreyansyon divèsite pèp New York la*

*Ankouraje Òganizasyon kominotè yo pou yo aplike pou 50 milyon dola pou ranfòse mezi sekirite yo epi pwoteje kont krim rayisans - dat limit pwolonje pou lòt aplikasyon yo*

*Anonse plan pou somè Inite a pou rasanble lidè kominotè yo epi konbat rayisans, ekstrèm vyolan, ak diskriminasyon*

*Bati sou Inisyativ Prevansyon kont Krim Rayisans Eta a ki sipòte pa 361 milyon dola nan finansman sibvansyon Eta ak Federal*

Gouvènè Kathy Hochul te anonse jodi a mezi pou anpeche krim rayisans, ankouraje tolerans, ak pwoteje Nouyòkè yo. Gouvènè a te siyen de lejislasyon pou sipòte efò prevansyon ak edikasyon kont krim rayisans, bati sou efò administrasyon an ap fè pou ogmante finansman pou pwoteje sib krim rayisans yo epi ogmante siveyans ak pwoteksyon pou kominote ki an risk yo. Premye pati lejislasyon an egzije moun ki kondane yo pou krim rayisans yo, anplis lòt penalite, swiv fòmasyon obligatwa oswa konsèy nan prevansyon ak edikasyon kont krim rayisans Dezyèm lan etabli yon kanpay nan tout eta a pou akseptasyon, enklizyon, tolerans, ak konpreyansyon divèsite, ki gen ladan, men pa limite a divèsite ki baze sou reliyon, ras, koulè, kwayans, sèks, etnisite, orijin nasyonal, laj, andikap, oryantasyon seksyèl, idantite seksyèl oswa ekspresyon. Gouvènè Hochul te ankouraje òganizasyon kominotè yo tou pou aplike pou 50 milyon dola nan finansman ki disponib pou ranfòse mezi sekirite ak pwoteje kont krim rayisman yo, epi pwolonje dat limit pou aplikasyon yo.

"Kè nou brize apre yon wikenn kote yo te masakre Ameriken LGBTQ yo epi yo te vize Juif Nouyòkè yo nan zak vyolans rayisans terib yo", **Gouvènè Hochul te deklare**. "New York fè pati bon moun yo, pa sila yo ki gen rayisman nan kè yo - n ap pran mezi solid

pou reprann vil nou an ak eta nou an nan men moun ki chaje rayisans yo, klan ak sipremasis blan yo. Ekstremis vyolan domestik se pi gwo menas pou sekirite peyi nou an, e se pou sa nou kontinye rete konsantre sou konbat rayisans epi kenbe Nouyòkè yo an sekirite."

"N ap voye yon mesaj klè ke nou pwoteje tout moun ki rele New York lakay yo", **Gouvènè Adjwen an Antonio Delgado te deklare**. "Pandan ogmantasyon klan ak vyolans sa a nan New York ak atravè nasyon an, n ap ranfòse repons nou an pou anpeche krim rayisans anvan yo rive pou asire tout Nouyòkè ka viv san pèrèz."

Toude pati lejislasyon an pwomouvwa inisyativ edikatif, ki sèvi kòm zouti kle pou plis tolerans ak akseptasyon, epi an retou ede kenbe kominote yo an sekirite kont zak rayisans ak vyolans.

Lejislasyon (S.6570/A.1202) amande lwa penal la pou etabli ke anplis lòt penalite, moun ki kondane pou krim rayisans yo dwe swiv fòmasyon obligatwa nan prevansyon ak edikasyon kont krim rayisans kòm yon pati nan pèn yo. Pwogram yo, sesyon fòmasyon yo, oswa sesyon konsèy yo dwe otorize pa tribunal la oswa ajans lokal yo an tèt ansanm ak òganizasyon k ap sèvi kominote ki afekte a.

**Senatè Eta, Toby Ann Stavisky, te deklare**, "N ap viv nan yon epòk dezenfòmasyon. Mansonj ak diskou divizyon ap ankouraje rayisans, epi rayisans sa a ap mennen nan zak vyolans san pwovoke. Istorikman, yo itilize zenofobi kòm yon zouti pou estimile dezinyon. Atak sa yo anrasinen nan inyorans ak resantiman. Nou dwe fè plis pase tou senpleman pini atakè sa yo. Kit se neo-Nazi nan tren an oswa ekstremis ki chaje ak rayisans nan Colorado, se moman pou ranplase rayisman pa edikasyon. Lejislasyon sa a pral ede edike agresè yo nan objektif pou ede kraze sik boulvèsan sa a. Mwen vle remèsyé Gouvènè Hochul paske li siyen lejislasyon sa a epi li demontre ke rayisans pa gen plas nan New York."

**Manm Asanble Rebecca Seawright, te deklare**, "Rayisans pa gen plas nan Eta New York. An repons a ogmantasyon twoublan nan zak vyolans ki chaje ak rayisans yo, ki gen ladan atak sou biwo distri mwen an, mwen prezante Pwojè lwa 1202 Asanble a pou mande fòmasyon, edikasyon ak konsèy "anti-rayisans" pou chak moun ki kondane pou yon krim rayisans. Mwen remèsyé epi felisite Gouvènè Kathy Hochul paske li sipòte ak siyen lwa enpòtan sa a pandan n ap wè yon ogmantasyon detrès nan menas yo pou kominote jwif ak LGBTQ+ ak moun koulè yo nan New York ak atravè peyi a. N ap pran gwo lapèn pou viktim yon lòt fiziyad vyolan sou moun LGBTQ+ yo nan Colorado Springs wikenn ki sot pase a. Edikasyon se yon antidot kle kont rayisans entolerans, epi lejislasyon nou an vize pou kenbe kominote nou yo an sekirite. Mwen fyè pou m kanpe ini ak Gouvènè Hochul kont ogmantasyon krim rayisans nan Eta New York",

Lejislasyon (S.123A/A.5913A) amande lwa egzekitif la pou etabli ak aplike yon kanpay atravè eta a pou akseptasyon, enklizyon, tolerans, ak konpreyansyon divèsite. Kanpay la, ki pral devlope ak enplemente pa Divizyon Dwa Moun, pral kowòdone ak kolabore ak òganizasyon publik ak prive yo, ki gen ladan, men pa sa sèlman, gouvènman lokal yo,

gwoup kominotè, distri lekòl yo, tanp adorasyon yo, òganizasyon charitab yo, ak fondasyon yo epi yo pral devlope materyèl edikatif ki dwe pibliye sou entènèt la, rezo sosyal, ak lòt platfòm pou rive jwenn piblik la.

**Senatè Eta Anna M. Kaplan, te deklare,** "Antanke yon refijye jwif ki te vini nan peyi sa a ki te sove anba vyolans antisemit nan peyi mwen an, kè m ap dechire kont eksplozyon rayisans ak vyolans ekstremis nou wè nan peyi sa a depi pandemi an. Mwen te fyè pou m leve kanpe epi lite kont rayisans nan chak opòtinite, men nou bezwen fè plis, epi pake lejislatif sa a se yon premye etap enpòtan pou fè klè ke rayisans pa gen plas nan Eta New York. Mwen rekonesan pou efò Gouvènè a pou abòde kriz sa a tèt pou tèt, epi mwen apresye li siyen pwojè Iwa mwen an jodi a."

**Manm Asanble Charles D. Lavine te deklare,** "Mwen felisite Gouvènè Hochul paske li siyen Iwa sa a ki pral pwoteje sekirite Nouyòkè yo. Gras ak Gouvènè a, pwojè Iwa mwen an ki egzije mize yo rekonèt atizay yo volè nan kominote Jwif la pandan epòk Nazi a an Ewop, vin yon Iwa kounye a. Pi bon fason pou konbat tout fòm rayisans se atravè edikasyon, ak lejislasyon li yo tankou sa a ki pral ede diminye krim degoutan nou kontinye wè yo regilyèman."

Efò lejislatif sa yo bati sou [246 milyon dola](#) nan finansman federal ke Gouvènè Hochul te ananse nan mwa oktòb la pou sipòte efò preparasyon pou sekirite nasyonal, lite kont teworis, ak efò preparasyon pou ijans atravè New York, ansanm ak [96 milyon dola](#) nan finansman Eta ak Federal konbine yo te ananse nan debi mwa sa a pou pwoteje òganizasyon kominotè san bi likratif yo ki sibi risk krim rayisans ak atak yo.

Administre pa Divizyon Sèvis Jistis Kriminèl (Division of Criminal Justice Services, DCJS) New York, pwogram Sekirize kominote yo kont Krim Rayisans lan ki finanse pa eta a ap chèche pwopozisyon pou 50 milyon dola kounye a, ki prevwa sipòte apeprè 1,000 pwojè atravè eta a. Gouvènè a te ananse kounye a DCJS pwolonje dat limit aplikasyon an soti 31 janvye 2023 rive 28 fevriye 2023 pou pwogram sa a, pou plis òganizasyon ki enterese, ki kalifye yo ka aplike.

Kreye an 2017, pwogram lan bay finansman pou ranfòse mezi sekirite yo epi anpeche krim rayisans kont sant kominotè sivik san bi likratif ak, mize kiltirèl, sant gadri, ak lòt òganizasyon san bi likratif ki ka vilnerab akòz ideoloji yo, kwayans yo, oswa misyon yo. Finansman sa a ka itilize pou sipòte amelyorasyon sekirite eksteryè oswa enteryè, ki gen ladan men pa limite a ekleraj, kadna, alam, bouton panik, kloti, baryè, kontwòl aksè, vè ki pa ka kase, fim anti eksplozyon, sistèm adrès piblik, epi pou premye fwa a, mezi pou ranfòse sekirite sibè. Finansman yo ka kouvri tou depans ki asosye ak fòmasyon sekirite. Jiska jounen jodi a, yo te bay plis pase 600 òganizasyon san bi likratif yon total 83.1 milyon dola pou sipòte apeprè 1,700 pwojè.

DCJS pral aksepte aplikasyon pou jiska 50,000 dola pou chak pwojè; chak òganizasyon ki kalifye ka soumèt jiska twa aplikasyon pou yon montan maksimòm ki se 150,000 dola a. Yon òganizasyon ki elijib kapab tou soumèt yon aplikasyon separe pou jiska 50,000 dola pou finanse yon pwojè sekirite sibè. Yo dwe soumèt aplikasyon yo bay DCJS

anvan madi 28 fevriye 2023. Vizite [paj sit wèb Sibvansyon/Finansman DCJS la](#) pou kondisyon kalifikasyon, enstriksyon, direktiv ak lòt enfòmasyon yo.

Gouvènè Hochul dènyèman te bay tou sipò dirèk pou sekirite publik ak pwogram preparasyon yo nan fòm [9 milyon dola](#) nan Finansman Sibvansyon Sekirite Nasyonal sible pou eskwadwon bonm, ekip materyèl danjere, ekip kanin deteksyon eksplozif, ekip taktik, sekou teknik, pwoteksyon enfrastrikti enpòtan, sibè-sekirite gouvènman lokal, ak ekip rechèch ak sekou iben atravè New York. Li te dirije tou [10 milyon dola](#) nan fon sibvansyon eta a pou sipòte gouvènman konte yo pandan y ap devlope plan prevansyon kont teworis nasyonal ak ekip evalyasyon ak jesyon menas apre atak terib sipremis blan an sou Tops Market nan Buffalo nan kòmansman ane sa a. DHSES te lanse tou premye Inite Prevansyon Teworis Nasyonal ki baze nan eta a epi li pral mande pou chak konte nan eta a devlope epi soumèt yon plan prevansyon kont teworis nasyonal ba DHSES anvan 31 desanm 2023 nan yon efò pou sispann krim rayisans yo anvan yo rive lè pi move domaj yo te deja fèt.

Sou direksyon Gouvènè Hochul, Lapolis Eta New York ogmante pwoteksyon pou kominote ki anba risk krim rayisans yo. Lapolis Eta a rete an kontak ak Depatman Lapolis New York epi yo pral kontinye kontakte kominote LGBTQ a atravè New York, ansanm ak sinagòg ak lòt espas kominotè jwif nan eta a. Lapolis Eta a kounye a gen 97 envestigatè ki te resevwa yon fòmasyon vast sou krim ki gen rapò ak patipri ki estasyone atravè eta a ki dedye a envestigasyon sou krim rayisans, plis pase doub kantite ki te an plas sa gen 6 zan. Pandan 6 ane sa yo, Lapolis Eta a te okipe plis pase 1,700 ankèt sou krim rayisans yo te rapòte.

Wikenn sa a, Polis MTA, Polis Eta a, NYPD ak Gwoup Travay Konjen kont Teworis (Joint Terrorism Task Force) FBI la te kolabore pou arete de nèg ame nan Estasyon Pennsylvania a nan Manhattan ke yo te akize ki t ap vwayaje ale nan Vil la ak plan pou koze vyolans nan kominote Jwif la. Ogmantasyon resous Gouvènè Hochul bay Lapolis Eta a ak Sant Ransèyman Eta New York la te kontribye nan arrestasyon sa yo.

Gouvènè Hochul te anonse tou li pral organize yon Somè Inite pou rasanble patnè kominotè ak gouvènmantal yo pou kanpe kont rayisans, ekstremis vyolan, ak diskriminasyon. Somè Inite a pral fèt nan mwa k ap vini yo epi swiv sesyon ekoute reyjonal yo, ki pral sipòte pa Polis Eta New York, Divizyon Sekirite Enteryè ak Sèvis Ijans Ian, Divizyon Sèvis Jistis Kriminèl, ak Divizyon Dwa Moun.

Patnè eta, lokal ak federal yo, lidè kominotè a ak lidè relije yo, ak defansè yo pral reyini nan somè a pou pataje politik, pwogram, ak pratik yo pou konstwi kominote ki pi an sekirite ak pi solid kote rayisans pa gen plas. Patisipan yo pral prezante tou anpil efò yo pou adresse krim ki motive pa rayisans yo, anpeche pwopagasyon ekstremis vyolan yo, epi ankouraje inite ak rekonsilyasyon.

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418